


醫籍攷

卷五十三  
五十四  
方論三十一  
三十二

武  
2  
27





世 2  
卷 27

九折堂山  
氏圖書

齊氏  
齊氏

圖書

醫籍考卷五十三

方論 三十一

東都 丹波元胤紹翁 編

羅氏知悌心印紺珠

一卷

佚

戴良曰羅名知悌字子敬世稱太無先生宋理宗朝寺人學  
精於醫得金劉完素之再傳而亨通張從正李果果二家之說  
然性褊甚特能厭事難得意云九靈山房集 丹溪翁傳  
朱震亨曰泰定乙丑夏始得聞羅太無并陳芝岩之言遂往



拜之蒙叱罵者五七次趨起三閱月始得降接因觀羅先生  
治一病僧黃瘦倦怠羅公診其病因乃蜀人出家時其母在  
堂及游浙右經七年忽一日念母之心不可遏欲歸無腰纏  
徒爾朝夕西望而泣以是得病時僧二十五歲羅令其隔壁  
泊宿每日以牛肉猪肚甘肥等煮糜爛與之凡經半月餘且  
時以慰諭之言勞之又曰我與鈔十錠作路費我不望報但  
欲救汝之死命爾察其形稍甦與桃仁承氣一日三貼下之  
皆是血塊痰積方止次日只與熟菜稀粥將息又半月其人  
遂如故又半月餘與鈔十錠遂行因大悟攻擊之法必其人  
充實稟質本壯乃可行也否則邪去而正氣傷小病必重重

病必死羅每日有求醫者來必令其診視脈狀回稟羅卧聽  
口授用某藥治某病以某藥監其藥為引經徃來一年半並  
無一定之方至於一方之中自有攻補兼用者亦有先攻後  
補者有先補後攻者又大悟古方治今病為能昭合隨時取  
中其此之謂乎是時羅又言用古方治今病正如拆舊屋接  
新屋其材木非一不再經匠氏之手其可用乎格致餘論  
錢冒曰羅知悌心印紺珠一卷知悌字子敬號太無先生集  
六散三九十六湯以總持萬病意在康濟斯民其盛心也是  
丹繕寫精楷乃名手所書宜珍秘之



國史經籍志一卷

存

自序曰素問載道之書也詞簡而義深去古漸遠行文錯簡  
仍或有之故非吾儒不能讀學者以易心求之宜其茫若望  
洋淡若嚼蠟直以為古書不宜於今厭而弃之相率以為局  
方之學間有識者又以濟其方技漫不之省醫道隱晦職此  
之由可嘆也震亨三十歲時因母之患脾疼衆工束手由是  
有志於醫遂取素問讀之三年似有所得又二年母氏之疾  
以藥而安因追念先子之內傷伯考之醫問叔考之鼻衄幼  
弟之腿痛室人之積痰一皆歿於藥之悞也心膽摧裂痛不

可追然猶慮學之未明至四十歲復取而讀之顧以質鈍遂  
朝夕鑽研缺其所可疑通其所可通又四年而得羅太無諱  
知悌者為之師因見河間戴人東垣海藏諸書始悟濕熱相  
火為病甚多又知醫之為書非素問無以立論非本草無以  
立方有方無論無以識病有論無方何以摸倣夫假設問答  
仲景之書也而詳於外感明著性味東垣之書也而詳於內  
傷醫之為書至是始備醫之為道至是始明由是不能不致  
疑於局方也局方流行自宋迄今罔間南政翁然而成俗豈  
無其故哉徐而思之濕熱相火自王太僕注文已成湮沒至  
張李諸老始有發明人之一身陰不足而陽有餘雖淳淳然



見於素問而諸老猶未表章是局方之盛行也震亨不揣  
蕪陋陳於冊并述金匱之治法以證局方之未備間以己意  
附之於後古人以醫為吾儒格物致知一事故目其篇曰格  
致餘論未知其果是否邪後之君子幸改而正諸

宋濂題辭曰金之以善醫名凡三家曰劉守真氏曰張子和  
氏曰李明之氏雖其人年之有先後術之有攻補至於惟陰  
陽五行升降生成之理則皆以黃帝內經為宗而莫之有異  
也張一再傳其後無所聞李雖多門弟子又在中州人有罕  
知之者獨劉之學授之荆山浮屠師師來江南始傳太無羅  
知悌于杭太無宗寶祐中人受幸穆陵得給事禁中性倨甚

無有能承其學者又獨至烏傷朱君始能傳之初君之未從  
太無也手抄陳師文裴宗元所定大觀二百九十有七方晝  
夜而習焉既而悟曰故方新病安有能相值者况是且殺人  
乃盡棄去度荆河走吳中尋師而求其說久之不能得復走  
宛陵走南徐走建業皆無吳中時纍纍道途聞方不能所適忽  
有以太無為告者遂還杭拜之凡十往返不得通君乃立其  
門終日不動太無憐其志為數暢三家之旨而一析以經越  
數年悉受其學以歸鄉之群醫方泥裴陳之學聞君言皆大  
驚已而又皆大服翕然共尊事之君年既高所見益粹精其  
自得者類多前人所未發乃徇門人張翼等請著為書若干



篇名之曰格致餘論持以示金華宗濂濂稿受而讀之見其  
立言深察證詳未嘗不歎君用志之勤也蓋當大觀之方盛  
行世之人烏知有所謂內經之學君獨能崎嶇數十百里必  
欲求師而受其說雖險阻艱難更嬰迭挫曾不爲之少動所  
以卒能成其學向使君之志稍變烏有今日哉傳曰用志  
不分其道乃成殆君之謂矣君之此書其有功於生民者甚  
大宜與三家所著並傳於世故濂得備書傳學用功之所自  
於篇端其見君之自序者因不暇及也君名震亨字彥脩許  
文懿公之高弟弟子公講學入華山時君即從之遊而聞道  
最先剛明正直不可于私其安負守道雖古君子弗過也而

醫又特其一事云至正七年冬十有一月日南至金華宗濂  
書於浦陽東明山中

劉桂曰丹溪醫之聖者也其爲格致餘論一書超邁今古奚  
容輕議然沉潛反覆竊有可疑者焉論中左大頰男右大頰  
女之說丹溪獨指氣血之陰陽及遺尿位之陰陽乃以醫人  
之左右手立論有戾經旨者可疑者一也醇酒宜冷飲之論吾  
見世人飲熱酒者亦無恙飲冷酒者雖感暑亦致病焉可疑  
者二也至如倒倉一法丹溪自云得之西域異人近世余自  
擊士大夫數人信行此法死者相繼可疑者三也噫西域之  
人殊方異域風氣不同稟賦亦異此法豈可行於東南柔弱



之人乎。門人誤錄於勞瘁吐血門中，為禍甚大。且勞瘁歎血，真陰虧損，藏府脾胃虛弱，津液枯竭，不宜吐瀉。昔徐文伯治范雲之疾，有取汗之戒，尚促天年。况吐下之法，施于勞損之人，可乎？或以是罪余，輕議前人。余應之曰：孫真人千金方有房中補益法，丹溪辯之曰：苟無聖賢之心，神仙之骨，未易為也。又曰：若以房中為補，殺人多矣。丹溪能為孫公之忠臣，余顧不能為丹溪之忠臣乎？語曰：不以人廢言，使丹溪復生，其殆不廢余言矣。續醫說

四庫全書提要曰：格致餘論一卷，元朱震亨撰。震亨字彥修，金華人。受業於羅知悌，得劉守真之傳。其說謂陽易動陰易

虧，獨重滋陰降火，創為陽常有餘，陰常不足之論。張外賓等攻之不遺餘力，然震亨意主補益，故諄諄以飲食色慾為戒。所立補陰諸丸，亦多奇效。孫一奎醫旨緒餘云：丹溪生當承平，見人多酗酒，縱欲精竭，火熾復用剛劑，以至於斃。因為此救時之說，後人不察，遂以寒涼殺人。此不善學丹溪者也。其說可謂平允矣。是編前有序，云古人以醫為吾儒格物致知之一事，故特以是名書。蓋震亨本儒者，受業於許謙之門，學醫特其餘事，乃性之所近，竟不以儒名，而以醫名。然究較方伎者流，為能明其理，故其言如是。戴良九靈山房集有丹溪翁傳，叙其始末甚詳云。



丹溪醫案

國史經籍志一卷

存

丹溪醫論

二卷

未見

朱氏傳方

一卷

未見

按右見于萊竹堂書目

丹溪隨身畧用經驗良方

二卷

未見

丹溪集

二卷

未見

按右見于述古堂書目

丹溪脈因證治

二卷

存



喻昌曰朱丹溪脈因證治一書先論脈次因次證後迺論證其書即不行而心法一書群方錯雜則共宗之寓意草

丹溪手鏡

三卷

述古堂書目作二卷

存

陳乾陽序畧曰丹溪先生之書為世所誦習如格致餘論局方發揮傷寒辯疑本草衍義補遺等集以列於張劉諸大家毋或敢置喙兵獨手鏡一帙為先生所秘惜左右行遊常挾與俱不輕以示人迄今垂三百年海內之急欲一見之不啻如長桑陽慶所稱禁方而不可得以為殆非人間者也有

嘗為言明府吳公乃僥得之於其後裔神物之出豈有其候耶先生之後興廢者數矣然皆徒秘其書相戒毋泄而不能有所表章故亦時有魚豕之憾公於是為一一改正而命劄劄以廣之不佞陽獲卒業焉其文簡質而旨奧行其洞人之臟腑陰陽而為之劑往往於單辭片語輒能竒中然大要淵源於黃帝語非素問弗道也

錢曾曰丹溪手鏡二卷此為清常手校本序稱丹溪著書數帙皆行于世此乃老年所作故傳之獨秘獨遲未知清常從何本是正其校書可謂專勤矣

金匱鉤玄



國史經籍志一卷

佚

李瀛曰戴原禮訂正丹溪先生金匱鈞玄三卷間以己意著其後

四庫全書提要曰金匱鈞元三卷元朱震亨撰明戴原禮校補中稱戴云者原禮說也未附論六篇不列於目錄中一曰火宣君相五志俱有論一曰氣屬陽動作火論一曰血屬陰難成易虧論一曰帶下辯論一曰三消之疾燥熱勝陰論一曰泄瀉從溼治有多法論皆不題誰作觀其帶下辯論引震亨之言則亦原禮所加也震亨以補陰為宗實閱直補真水

之先其以鬱治病亦妙闡內經之旨閱諸家無窮之悟雖所用黃檗知母不如後人之用六味圓直連本原所製越鞠丸亦不及後人之用逍遙散和平無弊然筆路藍縷究以震亨為首庸是書詞旨簡明不愧鈞元之目原禮所補亦多精確明史方伎傳載此書於原禮傳中卷數與今本同補其附以己意人謂不愧其師其為醫家善本可知矣原禮浦江人洪武中御醫本名思恭以字行故史作戴思恭朱國禎湧幢小品曰戴元禮國朝之聖醫也太祖稱為仁義人太孫即位拜院使云云元禮即原禮蓋國禎得諸傳聞故音同字異耳按焦氏經籍志別載平治會萃方三卷然與鈞玄一書



名異耳仍不著錄其編輯在于薛己二十四種中

丹溪秘傳方訣

十卷

存

張應鵬跋曰右丹溪秘傳方訣彥脩先生家藏書也證下有論論下有方辭雖簡畧包括無遺誠若良金美玉爲世之稀有者予久慕斯集弗獲一觀近因考績歸省偶得觀于友人朱思貞家目駭心異喜而不寐者累夕遂求思貞原本用銀諸梓庶使先生利濟之心不致於泯沒而紛紜之庸醫不致於繆誤思貞素以仁愛存心况能旁通于醫者樂然付與因

捐俸命工計日刊成仍僭書于卷末以記歲月云時成化十一年歲次乙未八月九日四明張應鵬誌

丹溪治法語錄

一卷

未見

丹溪心法

國史經籍志三卷

未見

楊氏珣丹溪心法類集

醫藏目錄四卷



存

程氏充丹溪心法

四卷

存

自序畧曰泰定中丹溪朱先生起江東先生許文懿公高弟  
諱震亨字彥修婺之烏傷人爲元鉅儒因母病脾刻志於醫  
曰醫者儒家格物致知一事養親不可缺遂遍遊江湖尋師  
無所遇還杭拜羅太無乃得劉張李之學以歸窮研素問之  
旨洞參運氣之機關局方之非宜悟戴人之攻擊別陰陽於  
疑似辯標本於隱微審察血氣實虛探究真邪強弱一循活

法無泥專方誠醫道之宗工性命之主宰而集先賢之大成  
者也其徒趙以德劉叔淵戴元禮氏咸能翼其道遺書傳播  
有年景泰中楊楚玉集其心法刊於陝右成化初王季羶附  
方重梓於西蜀志欲廣布海內使家傳人誦不罹大枉其用  
心仁矣而楊之集篇目或有重出而亦有遺附以他論使玉  
石不分王因之附添諸方多失本旨充江左一愚夙志於此  
每閱是書實切病焉輒不自揆妄意竊取平治會萃經驗方  
及玉機微義衛生寶鑑濟生拔萃東垣河間諸書校究之尾會  
首因証求方積日既久復得今中書烏傷王允達先生以丹  
溪曾孫朱賢家藏的本寄示合而參考其或文理乖訛意不



相貫者詳求原論以正其誤篇目錯綜前後重叠者其繁  
冗以存其要此有遺而彼有載者采之以廣其法論既詳而  
方未備者增之以便檢閱一言去取無敢妄有損益庶幾丹  
溪之書猶涇渭合流清濁自別烏鷺同棲皂白攸分學者免  
惑於他歧疾疢得歸於正治未知其然否乎極知僭踰無所  
逃罪同志之士倘矜其愚正其訛舛而賜教之則充之至願  
也於是乎書成化十七年歲次辛丑仲冬休寧後學復菴居  
士程克謹識

跋曰楊楚玉類集心法中間水腫虛腫痛風肢節痛麻木婦  
人小便不通等證文多重出又取別論附於其間雖能補其

缺畧不免混淆難別致丹溪主病之旨不明王季獻因正論  
及附論中方未備載又作附錄如夢遺椿樹根丸淋證六味  
地黃丸婦人三補丸等不錄丹溪原方却於他書取方名相  
同增入藥味與病懸隔充恐用者不察反致有誤今以丹溪  
原論考訂遺誤錄於證首次附戴元禮辨證次錄正方以見  
正法不雜其附論不去題曰附錄用存編者之意也復盡載  
附論中方題曰附方恐人妄去取也庶幾明白又增入外科  
倒倉等法以翼其未備觀者詳焉成化庚子花朝日程克識  
程敏政序畧曰予宗人用光世業儒而好醫其讀素難之書  
甚稔最喜朱氏之說嘗以丹溪心法有川陝二本妄爲世醫



所增附深懼上有累于朱氏乃爲之彪分臚列釐其誤而去其複以還其舊凡朱氏之方有別見者則以類入之書成將刻梓以傳請予序予故以多病好醫而未能也輒以醫卜並言于篇首使業醫者知其道本出于聖人其書本足以比易而非可以自卑則日勉焉以致力乎本草素難脈經之書以及五君子之說而尤以朱氏爲入道之門則庶幾上可以輔聖主拯世之心下可以見儒者仁民之効而醫不失職矣用光名充休寧文口人與予同出梁將軍忠壯公後

方氏廣丹溪心法附餘

明志二十四卷

存

自序曰昔予母年艾時以家事繁冗不暇啜粥惟飲冷酒以致內傷脾胃遍身發出赤斑是時天庖瘡傳赤斑與相類醫之者多不能辨遽然而卒罔覺其咎蓋斑無頭粒瘡有頭粒易分別而不知爾歟後葬母不得已而與鄰人訟三載始白旣而感激乃志於學讀書之餘恒取醫書丹溪心法覽之見其所謂飲食內傷脾胃發出赤斑之論乃喟然悲嘆其前病果誤於醫者正程夫子所謂病卧於牀委之庸醫譬之不孝者也終天之恨曷有窮耶由是心之於醫若口之於蜀黍不能釋也竊惟斯道肇自軒岐迄漢而下代不之賢求其可以



爲萬世法者張長沙外感李東垣內傷劉河間熱證朱丹溪  
雜病數者而已然而丹溪實又貫通乎諸君子尤號集醫道  
之大成者也先生既沒而其遺書則有丹溪心法傳于世蓋  
其術至精故其爲言至切寔保命之良規濟人之妙訣也惜  
乎是書詳於法而猶畧於方袖珍等書則又詳於方而畧於  
法比皆不便檢閱時祥符鄭尚宜張汝孝輩亦達於醫者也以  
予言爲然予於是乃將心法立訛留正群方刪繁就簡合爲  
一書凡五年餘始脫藁不敢他有所名名之曰丹溪心法附  
餘其間病目分之以門藥方聚之以類每證之下先具心法  
後附群方俾法不離乎方方不離乎法又取丹溪本草衍義

補遺及崔真人脈訣舉要王節齋明醫雜著附載於中而於  
醫之藥性脈理病機治法經絡運氣六者粗備其正誤補闕  
以俟後之君子然初學之士與養生之家或有取焉庶乎得  
醫道之正而不爲他歧所惑僭妄之罪固知無所逃矣謹序  
嘉靖十五年丙申春三月穀旦新安後學方廣序

立書本旨曰予觀得醫道之全者丹溪一人發丹溪之蘊者  
心法一書然其書自程用光重訂之後若無餘憾第附錄不  
盡削去而與正法矛盾焉丹溪纂要醫學集成雖能備丹溪  
群書然因心法混淆而采取亦不免於差謬蓋丹溪群書其  
門人戴元禮趙以德劉叔淵已采載於丹溪心法之上矣而



纂要集成二書。又是將丹溪群書翻謄一次。今以百年之後。追想其人之言。何若親炙領教之爲的哉。玉機微義。蒐輯群書。條陳潔白。爲醫書之折衷。惜乎丹溪心法。而不得與焉。袖珍方。乾坤生意。保生餘錄等書。雖備群方。然其間有一等用藥。辛香燥熱。與夫頭眩之劑。寔非氣血虛者所宜乎。因此而留心焉。今除玉機微義一書不煩之外。謹將丹溪心法。除去附錄。止以正法。正方。具于前。群書。惟取切合病情之劑。附于後。彪分臚列。集爲一書。名曰丹溪心法附錄。將與玉機微義同驅。竝駕于世。而醫之方書。庶幾乎備矣。觀者詳焉。

凡例曰。一病目。謹依丹溪心法之舊。凡有增入者。註新增二

字以別之。其間以門而分者。庶見病機之同也。一各證首具丹溪正法。正方。依程用光考索精確。爲醫門萬世之規矩準繩者也。一附諸賢論。庶見病之源流。治之方法也。不能悉載。其間有關者。君子宜於玉機微義求之。一附脈理。庶知病之陰陽表裡。虛實寒熱之惜也。亦不能悉載。其間有關者。宜於脈經脈訣求之。一附諸方。以輔丹溪所不及。其間以類而聚者。庶見治法之異也。然方書汗牛充棟。不勝其多。姑取不達於理者。列載于上。以待君子采擇焉。一玉節齋明醫雜著方論。取附于各證之下。蓋節齋深得丹溪之旨。故備載以俟參考焉。一病證。欠發明處。藥方有疑難處。予綴俗



說以通之有廣按二字別之倘有差謬後之君子幸賜教焉  
一丹溪本草衍義補遺雖另成一書然陝板蜀板閩板丹溪  
心法咸載之程用光重訂丹溪心法而微板乃削去之反不  
為美今仍取載書者使人獲見丹溪用藥之旨也

賈誼序畧曰予以多病懇乞賜休林下暇日檢方亦竊疑之  
於是遠延方君過穎因出所次丹溪心法附錄凡二十四卷  
相與訂之矣方君名廣字約之古菴其號新安儒醫也嘗遊  
河洛旅寓陳留野亭劉公亦雅重之恒以藥活人乃謂是書  
超邁群識尤切日用雖楊楚玉輩再纂而不能備集脈訣之  
詳程用光氏翻刻而不能盡芟附錄之誤於是重加彙括記

者正之偽者去之且萃諸君子方論於下精切簡要不畔古  
經銓次成帙間亦竊附己意以發明之

四庫全書提要曰丹溪心法附錄二十四卷明方廣撰廣字  
約之號古菴休寧人是書成於嘉靖丙申因程用光所訂朱  
震亨丹溪心法贅列附錄與震亨本法或相予盾乃削其附  
錄獨存一家之言別以諸家方論與震亨相發明者分綴各  
門之末然均非震亨之原書矣

趙氏良仁丹溪藥要

佚

按右見于蘇州府志



盧氏和丹溪纂要

國史經籍志八卷

趙應春刻為六卷  
楊捷刻為二卷

存

允例曰丹溪衣鉢一書其立例據病論治最為切當但畧而未備門人各為增錄名蒼叢鉤玄心法師友淵源等書固亦遺漏尚多且其中互有得失今肆為刪正裁取更加潤色以歸于一其有附會謬說竄入雜方直削之 一格致餘論等成書并本傳及書 中所具長篇則摘取其要語必加潤色錄之 一允門人所錄論方果係丹溪所授者不復識別一篇中所有古方如內傷篇補中益氣湯之類悉附于後又有

一等古方如傷寒篇麻黃湯之類雖非篇中所用然皆切於施治而不可無者亦附之以備參用 一允藥方惟備于一處於目錄中見之 一允丹溪本文皆大字愚所註皆小字但其藥方下分兩制度亦照舊用小字者所以便觀覽也 一允篇中藥方下分兩制度或有或無或詳或略或大字或小字皆仍諸書之舊也 一允篇中方名亦用陽文各藥亦分層具列皆所以便檢覽也

李呈祥曰丹溪隱君子也細觀纂要一書燮理之道寓焉不但可為却病延年之助而已 古源山人集

按醫藏目錄有趙應春丹溪心要據費延之纂要序



曰丹溪纂要海內刻之累矣重校之者江陰蟠龍山人也山人趙姓諱應春幼業舉子書畫殊絕有松雪遺風素多病尤精於醫云則所謂心要者亦是書也余嘗得丹溪要劑一書凡八卷題云山陰適道人校蓋亦唯改是書篇目者乃明時坊刻也

亡名氏丹溪適玄

醫藏目錄三十卷

未見

丹溪心要

八卷

存

高賓序曰醫家之有丹溪猶吾儒之

夫子蓋惟深於

其道而

真獨得之妙則凡立言成

繼往開

來師法百世莫之

丹谿之

為醫

南者多矣成化間又有心法之刻弘治間又有醫要之刻此外又有心要一書則所家藏而未出者歲雖已刊行而魯魚亥豕訛舛特甚吾姪子正潛心斯道之久而常寤寐於丹谿之心故於是書尤注意焉又誠不忍坐視其謬以誤天下也遂加手校而重刻之俾同人以共濟斯民於仁壽之域雖極勞費所不辭焉可尚也已吾因錯伍三書而互觀之心法



言心而不曰要醫要言要而不曰心此則曰心又曰要焉蓋  
雖一家之言互相出入而此書之視二書則尤精且備焉蓋  
實丹溪精神心術之微鑿鑿乎流出肺腑者矣此心要之所  
由名也

葛氏乾孫醫學啓蒙

佚

徐顯葛乾孫傳曰葛乾孫字可久平江人也生而負奇氣儀  
狀偉特膂力絕倫未冠好爲擊刺之術戰陣之教百家衆技  
靡不精究及長遂更折節讀書應進士舉所業出語驚人主  
司方按圖索駁不能識跡弛士把玩不忍捨置君亞撰君曰

此不足爲也吾寧齷齪從諛離析經旨以媚有司意乎遂不  
復應試猶時時指授弟子皆有可觀金華黃公晉尤奇其文  
勸之仕不應世傳藥書方論而君之工巧獨自元得治疾多  
奇驗自丞相以下諸貴人得奇疾他醫所不能治者咸以謁  
君無不隨愈有士人患傷寒疾不得汗比君往視則發狂循  
河而走君就摔置水中使禁不得出良久出之裹以重繭得  
汗解其治他疾多類此當是時可久之名重於南北吳人有  
之四方者必以可久爲問四方大夫士過吳中亦必造可久  
之居而請焉其爲人倜儻而溫雅慈愛而好施故人無賢不  
肖皆愛敬之至正壬辰徽寇轉掠江浙吳人震恐浙西廉訪



僉事李公仲善請君與圖君勸城之因守以討賊仍請身任其事李公壯其言然其計卒城之而民賴以安明年癸巳春正月與予遊閬元佛舍私與予言吾聞中原豪傑方興而吾不及預命也夫公茲六氣淫厲吾犯司地殆將死矣如斯必於秋予白何至是踰月果疾予往視之則猶談笑無他苦秋七月沐浴竟遂偃然而逝年四十有九其詩未及詮次藏于家其行於世者有醫學度象又經絡十二論君既沒而朝廷聘君之命適至已無及矣稗史集傳

十藥新書

澹生堂書目一卷

存

序略曰前十藥如神之妙如仙之靈雖盧醫扁鵲在世亦不過此吁時之方脈用藥不過藥木金石碌碌之常用耳何以得通神至仙竒異決効之藥也予蒙先師傅授此書在於中吳治勞證起死回生者何止千餘人止用得十灰散花葉石散獨參湯保和湯保真湯太平元消化元病決愈未嘗用後之三食料之藥間或用之則猶還愈予平生得此妙用受其金銀禮物曷可計也未嘗與一人予今漸老恐此書泯失重錄次序一新名之曰勞證十藥神書留遺吾家子孫用之不許亂授外人如違父訓以不孝也時至正乙酉一陽日可父書



於姑蘇養道丹房

又曰余自髫髻學業醫道攷究方脉三十餘年遍歷江湖多學廣博者不過言語文字形容之耳及至用藥治病皆不能捷是以日夜苦心用志務在中病後遇至人同處三月斯人極明醫道精通方脉用藥如發矢無不中的余曰必神人也遂拜爲師得授奇方一冊閱之或羣隊者或三四味者皆余目觀至人用效者也使予如久旱逢霖夜行得月心中豁然自此回至吳中一用一捷無不刻驗信乎奇方可錕梓者也余以三餘暇日將至人所授奇方併日用决效之法類成一帙名曰十藥神書蓋余用效者輒記錄之今西浙大癡道人

與余通家之好用禮求授故錄以奉養生齊人之功用爾昔至正戊子春正月三陽日可久書於蘇之春先堂

寧獻王序曰藥有奇方醫有妙理非天錫神授世俗而能是乎古之醫方非不多世之名醫非不衆治療證者皆載於方冊矣然能知是證而不能治其疾洙其疾者而無更生之說則曰醫所不療之疾也果方之不驗歟醫之不然歟孰不知犯大難者非神力不能免苟非神聖之功曷能救其死之耶是書也非世醫之常方實神授之秘書也胡氏子瞻傳子雲翱雲翱傳子光齊八十年間活數百人矣未有藥到而不愈者誓曰不許輕世妄傳違者同不孝論光齊爲吾王門佳賓



得之予曰仁人之心天下共之豈特私於家哉乃取崔氏灸法付之以倡其書仍命刊印博施化誠不刊之秘書也得之者實希世之奇遇焉可謂生死出于指掌有是理矣

程永培跋曰吾吳天士葉先生凡治吐血症皆祖葛可久十藥神書更參以人之情性病之淺深隨宜應變無過不及治無不愈然亦治之於初病之時與夫病之未經深入者若至五臟徧傳雖盧扁亦莫可如何矣家藏此書有年幾獲脉望故亟付梓然書中僅列十方世皆以方少忽之不知十方中錯綜變化有幾千百方故復採周氏之說使人粗曉業是者更察虛損二字分自上而下自下而上自不敢繫以六味閱

手矣

劉桂曰葛可久十藥神書其方治勞損吐血頗有功效但疑太平丸後跋曰此方利人甚衆所得貺不可勝紀未嘗妄傳非人余漸老恐致泯失由是編次與子孫濟人無窮之利云觀此等語知其非葛氏之書矣可久豪傑士也雖醫術亦所不屑爲之豈區區言利者哉姑蘇志有可久傳稱其著書有醫學啓蒙經絡十二論而不載是書非其所著也明夫

續醫說

按弟堅曰余嘗疑續醫說補葛可久十藥神書觀其跋語知非葛氏之書而今本則云胡子瞻得之於異人傳



于子孫一語不及可久矣。頃閱脩月魯般經後錄其載  
十樂又有可久跋正與其言符。且據李濂醫史及湖海  
搜奇可久之學特受其父而是書有先師字樣益可疑  
也。然魯般經爲元季明初之書與可久眉睫相接則實  
書之成殆在可久存世之日豈以其盛名而然乎。

亡名氏上清紫庭追勞仙方

醫藏目錄一卷

存

老叟自序曰吾自處世以來精研藥術急救濟危鍼灸明堂無  
不詳覽尋文檢籍洞視五藏之盛衰緬懷古人世莫能究至如

晉景公何爲而死親太子何爲而生吾思刮骨續筋開腸取病  
惟有傳死之病最爲難測雖是患起一身變動萬種矣爲醫者  
能明脈候察病根本如此治療固不爲難若差毫釐則失千里  
夫傳死勞者皆因三屍鬼疰九蟲傳染具載其原以閱未悟  
劉淵然序曰人之百病莫甚於癆瘵始於一身終則延蔓而  
有滅門之禍甚則及乎親友不已慘哉因存先師原陽趙公  
手編治癆方論蓋出紫庭法中皆前代明師所論治要方法  
實爲簡切間嘗以之施人無不奇驗是用鈔刻以廣流傳倘  
苟有是病而得是書者不得開津啓鑰而可以續命於危急  
之秋矣且使人人得以同躋於仁壽實所願也洪武二十九



年歲次丙子孟秋章貢體玄子劉淵然書

呂氏復四時變理方

佚

按右見于九靈山房集滄洲翁傳

滑氏壽醫韻

佚

按右見于明史本傳

櫻寧生要方

醫藏目錄一卷

未見

醫學引教

醫藏目錄一卷

未見

滑氏方脈

未見

按右見于古今醫統

櫻寧生補瀉心要

一卷

存

醫學子蠹子書



五卷

未見

按右見于浙江通志

項氏所脾胃後論

佚

餘姚縣志曰項昕字彥章自永嘉來徙幼好方數外大夫杜曉村世業醫曾受其書讀之稍長學易趙穆仲葉見山後以母病醫誤投藥死痛之乃願志醫術聞越大儒韓明善名往拜之得所藏方論甚富後諸陳白雲受五診奇脈歷試其說皆精良會金華朱彥修來越出金源劉河間張戴人李東垣諸

書示之昕獨疑古方不宜治今病之論亟治錢塘見陸簡靜始悟古今方同一矩度也又往浙右見葛可久論劉張之學往建業見戴同父誤五運六氣撰要若干篇授之太醫院張廷玉善橋引按杌甚奇昕亦事之盡其技於是為人診疾病決死生無不立驗諸貴人辟為掾吏非昕尚也門人力請著書作脾胃後論補東垣之未備昕善辭章善音律工繪畫而獨以醫顯

醫原

佚

戴良抱一翁傳曰抱一翁者東嘉人也今居越江上姓項氏



名昕字彥章晚更自號抱一翁所著書有竹齋小稿及脾胃  
後論別撰醫原若干卷議論宏贍未及成

九靈山房集

醫籍考卷五十三

醫籍考卷五十四

東都丹波元胤紹翁編

方論 三十二

周定王 楠 普濟方

明志一百六十八卷

舊脫一百二字今據四庫全書提要補訂

未見

明史本傳畧曰周定王楠太祖第五子洪武三年封吳王十  
一年改封周王命與燕楚齊三王駐鳳陽十四年就藩開封  
楠好學能詞賦嘗作元宮詞百章以國土夷曠庶草蕃蕪考  
核其可佐饑饉者四百餘種繪圖疏之名救荒本草關東書



堂以教世子長史劉淳爲之師洪熙元年薨

四庫全書提要曰普濟方一百六十八卷明周定王楠撰是書古今方劑彙輯成編楠自訂定又命教授滕碩長史劉醇等同考論之李時珍本草綱目所附方採於是書者至多然時珍稱爲周憲王則以爲楠子有歟所作未免舛誤明史執文志作六十八卷與此不合則又誤脫一百二字也凡一千九百六十論二千一百七十五類七百七十八法六萬一千七百三十九方二百三十九圖採摭繁富編次詳析自古經方無更賅備於是者其書蒐羅務廣頗不免重複抵牾醫家病其雜糅罕能卒業又卷帙浩博久無刊版好事家轉相

傳寫舛謬滋多故行於世者頗罕善本尤稀然宋元以來名醫著述今散佚十之七八楠當明之初造舊籍多存今以永樂大典所載諸秘方勘驗是書往往多相出入是古之專門秘術實藉此以有傳後人能參考其異同而推求其正變博收約取應用不窮是亦仰山而鑄銅煮海而爲鹽矣又烏可以繁蕪病哉

保生餘錄

醫藏目錄二卷

存

李氏恒周府袖珍方

四卷



存

合肥縣志曰李恒字伯常合肥人洪武初以醫名選入太醫院擢周府良醫常奉令旨類集袖珍方諸書後以老致仕王親賦詩以餞命長史錢塘瞿佑序其事

周定王序畧曰予當弱冠之年每念醫藥可以救大傷之命可以延老疾之生嘗令集保生餘錄普濟等方方雖浩翰編輯多訛至洪武庚午寓居真陽知彼夷方山嵐瘴癘感疾者多惜乎不毛之地里無良醫由是收藥諸方得家傳應効者令本府良醫編類錄諸小板分爲四卷方計三千七十七門八十一名曰袖珍袖者易於出入便於巾笥珍者方之妙選

醫之至寶故名袖珍數年已來印板模糊今於永樂十三年春令良醫等復校訂正刊行於世庶使不失妙方永茲善事嗚呼天高地厚春徃秋來日陵月替海水桑田况人物乎吾嘗三復思之惟爲善跡有益於世千載不磨昔太上有立德有立功有立言今吾非以徇名將以救人之疾苦也將以於世立功也時歲乙未季秋書成廣行印施豈曰小補云乎

寧獻王權乾坤生意

明志四卷

存

錢謙益曰寧獻王諱權高皇帝十六子生而神姿明秀白哲



美鬚再始能言自稱大明奇士好學博古諸書無所不窺旁  
通釋老尤深于史共武二十四年冊封之國大寧文皇帝踐  
祚改封南昌恃靖難功頗驕恣多怨望不遜晚年深自韜晦  
益慕冲舉自號臞仙建生墳緱嶺之上數往遊焉凡群書有  
秘本莫不刊布國中著通鑑博論二卷漢唐秘史二卷史  
斷一卷文譜八卷詩譜一卷神隱肘後神樞各二卷壽域神  
方四卷活人心二卷太古遺音二卷異域志一卷遐齡洞天  
志二卷運化玄樞琴阮啓蒙各一卷乾坤生意神奇秘譜各  
三卷采芝吟四卷其他註釋數十種經子九流星曆醫卜黃  
台諸術皆具古今著述之富無逾王者又作家訓六篇寧國

儀範七十四章

乾坤生意秘韞

一卷

存

壽域神方

崇禎元年青陽閣  
重刻作延壽神方

明志四卷

存

臞仙活人心

三卷

存



苗氏 仲通 備急活人方

未見

楊維禎序曰醫莫切於對證證莫切於對藥藥投其對牛溲馬勃癩狗之寶能擅功於一時不然黃金水銀鍾乳琅玕元之砂婆律之腦嶺蛇之黃中無益其實也餘姚醫學錄苗君仲通論著備急活人方會粹諸家所載祖父所傳江湖所聞及親所經驗者筆成一編世有奇疾醫經所不備醫流所不識獨得於神悟理會而著為奇中之方此難也夫人不幸抱奇疾至於醫經不備醫流不識遂謂無藥可治使病者待期而盡不亦可悼也哉妄庸者亂投藥餌以探疾重不幸速其

斃是醫殺之也是書一出備醫經之未備識醫流之未識使天下不幸抱奇疾有對疾之證對證之藥不重不幸為妄庸醫之所殺是不大可慶歟昔甄權不著方書其言曰醫者意也不可以著書權蓋以意得者自秘非叔後之仁也君推其獨得嘉與天下後世共其用心廣狹如何哉錐諸梓而過微予序於是乎序 鐵匡集

趙氏 良仁 醫學宗旨

未見

按右見于蘇州府志

王氏 履 醫經滄澗集



一卷

存

李廉曰余讀王安道涪涸集二十一篇未嘗不深歎其察理之精云首篇謂神農嘗百草為淮南子之妄嗣論四氣所傷五鬱二陽病中暑中熱之辨咸有至理非苟作者近時王文恪公荅有曰始余讀涪涸集知安道之深於醫不知其能詩也及脩蘇州志知其能詩又工於文與畫也嗚呼畫未技耳詩文姑舍是余於安道之醫深有取焉爾醫史

四庫全書提要曰醫經涪涸集一卷元王履撰履字安道崑山人學醫於金華朱震亨盡得其術至明初始卒故明史載

入方伎傳中其實乃元人也嘗以傷寒論中陽明篇無目痛少陰篇言胸背滿不言痛太陰篇無噎乾厥陰篇無囊縮必有脫簡乃取三百九十七法去其重複者二百三十八條復增益之仍為三百九十七法因極論內外傷經旨異同併中風中暑之辨撰為此書凡二十一篇其間闡發明切者如亢則害承乃制及四氣所傷皆前人所未及他若溫病熱病之分三陰寒熱之辨以及瀉南補北諸論尤確有所見又以素問云傷寒為病熱言常不言變至仲景始分寒熱然義猶未盡乃備列常與變作傷寒立法考一篇李廉醫史有履補傳載其著書始末甚詳觀其歷數諸家俱不免有微詞而內傷餘



議兼及東垣可謂少可而多否者然其會通研究洞見本原於醫道中實能貫徹源流非漫為大言以夸世也

標題原病式

一卷

佚

百病鉤玄

二十卷

佚

醫韻統

一百卷

佚

按右三書見于醫史補傳

戴氏原禮證治要訣

十二卷

存

醫史補傳略曰戴思恭字原禮以字行婺州浦江人也家世儒業究心醫術而志在澤物少隨父在徒步至烏傷從朱丹溪先生遊先生見其穎悟絕倫乃盡授其術原禮以之治療諸病往往奇驗甚衆當時遊丹溪之門者弟子頗多惟原禮父子最得其傳父蚤卒原禮盛行浙之東西晚年遭際聖明



以名醫被徵為御醫積官至太醫院使宋學士景濂有文贈之亟稱其醫術之妙非一時諸人可及平生著述不多見僅有訂正丹溪先生金匱鈎玄三卷間以已見附著其後又有證治要訣證治類方類證用藥總若干卷皆隲括丹溪之書而為之君子以為無愧師門云

錢曾曰戴元禮證治要訣十二卷復菴受文皇寵顧供奉之餘著為此書正統八年春朝鮮入海捕魚風飄至浙江官軍以為倭寇擒獲解京收候飢寒困苦復菴悉衣糧供贍之卒使之寧歸其存心濟物如此是書惟以活人為念有功于醫道豈淺鮮哉吳文定公錄而藏于叢書堂重其人并以重其

書也

按先子曰復菴一書不言及脈其意何也許胤宗嘗謂醫特意耳思慮精則得之脈之候幽而難明吾意所解口不能宣也復菴其有見于斯乎

又按供贍朝鮮夷人之困苦者浙江通監察御史陳崑也陳時刊行是書故祭酒胡濙序言及于斯錢氏誤為復菴所為者何

證治類方

十二卷

存



類證用藥

國史經籍志一卷

未見

戴復菴方書

未見

按右見于絳雲樓書目

推求師意

二卷

存

汪機序曰夫師者指引之功也必須學者隨事精察真積力

久而子師之引而不發者始得見其躍如者焉苟或不然師者未必能引進學者未必能起予二者須失之也夫何益之有哉故曰不憤不啓不悱不發舉一隅不以三隅反則不復也其斯之謂歟予于歛之名家獲觀是編觀其中之所語皆本丹溪先生之意門人弟子推求其意而發其所未發者此所謂引而不發而得其躍如者焉予深喜之遂錄以歸後休之率口項君恬以疾來就予治予邑石壑陳子楠以醫而過予館因出以示之二人者心意相得一則曰是可以養于吾疾也一則曰是可以補于吾醫也乃相告于予曰吾二人共梓之以垂不朽何如予曰醫乃仁術也筆之于書欲天下同



歸于仁也。今若刻布，以廣其傳，則天下病者有所養，而天下醫者有所補，其仁惠及于天下大矣。豈特二子然哉？此予之所深嘉也。又能善推予之所欲推矣。因題之曰推求師意，故僭序之以志喜焉。

**四庫全書提要**曰：推求師意二卷，明戴原禮撰，原禮卽校補朱震亨金匱鈎玄者也。是編本震亨未竟之意，推求闡發筆之於書，世無傳本。嘉靖中祁門汪機覩其本於歙縣，始錄之以歸。機門人陳楠校而刊之，其名亦機所題也。考李廉謨更有原禮補傳，補平生著述不多見，僅有訂正丹溪先生金匱鈎玄三卷，間以己意附於後。又有證治要訣，證治類方，類證

用藥若干卷，皆彙括丹溪之書而為之。然則此二卷者，其三書中之一歟。原禮本震亨高弟，能得師傳，故所錄皆秘旨微言，非耳剽目竊者可比。震亨以補陰為主，世言直補真水者，實由此開其端。書中議論大率皆本此意。然俗醫不善學震亨者，往往矯枉過直，反致以寒涼殺人。此書獨能委曲圓融，俾學者得其意而不滋流弊，亦可謂有功震亨者矣。

**葉子**

子奇

醫書節要

十卷

未見

按右見于浙江通志引括蒼彙紀



伍氏子安 活人寶鑑

十卷

未見

江山縣志曰伍子安幼通經史長邃於醫學請者如市皆不責報郡守張實薦爲御醫所著有活人寶鑑十卷學士宋濂志其墓

徐氏彥純 醫學折衷

佚

劉氏純 玉機微義

醫藏目錄五十卷

存

自序曰醫書自內經而下歷數千載善斯道而作者非一人其間有言診者有論證者有集方者莫不皆裨於世用然奧妙之旨奚所發揮雖世異病殊以方取驗若出一人之手迥不知世運之遠作者之衆然人同此心心同此理漢張仲景本經旨傷寒之法言診論證以例處方後之學者得有所據晉唐以來其道益廣用其法者不一或止言雜病診證或求奇示怪秘而不傳好事者慕其風而繼作或止掇於方雖有一源一意之可觀又非百代可行之活法也始純從學於江左馮先生庭幹間嘗請其義授以會稽徐先生所著書一帙



觀其法求其意蓋出於內經非前所謂也且古今作者非一人其法各得一意而後人執之該治不知通變之法與經旨多相違戾不無得失是以先生究探古今作者源意按金劉守真元李明之朱彥脩諸氏論集本於經旨而折衷其要發明中風痿痰泄瘧諸門診證方例非一源一意而有通變乎百證千方者斯為古今可行之活法也歟豈止集方而已先生諱彥純字用誠蚤歲嘗客吳中以春秋教授鄉之俊彥今沒十有二年始遇其從弟用中獲詢先生學行知深於醫者也又嘗見其本草發揮竊意前書必有全帙惜今不可見矣嗚呼歲月云邁九原不作幸而遺墨昭然生意如在以先生所

著取效熱火暑燥濕寒等門診證方例妄意續于諸門之末雖心同理而不免獲狂僭之過因按諸內經至數至名之日乃目其書曰玉機微義未知其果是否後之明哲有所正焉於是乎書皆共武丙子三月朔旦吳陵劉純序

四庫全書提要曰玉機微義五十卷明徐用誠撰劉純續增用誠字彥純會稽人純字宗厚咸寧人用誠原本名醫學折衷分中風痿傷風痰欬帶下泄瀉瘧頭痛頭眩欬逆痞滿吐酸瘧癘風癩破傷風損傷十七類純以其條例未備又益以欬嗽熱火暑濕燥寒瘡瘍氣血內傷虛損積聚消渴水氣脚氣諸症及胃脹滿喉痺淋瀝眼目牙疳腰痛腹痛心痛癰疹



黃疸霍亂厥痺婦人小兒三十三類始改今名仍於目錄各  
註續添字以相辨識或於用誠原本十七類中有所附論亦  
註續添字以別之是二人相繼而成本書可據明史藝文志  
唯著劉純之名蓋失考也其書雖皆採掇諸家舊論舊方而  
各附案語多所訂正非鉅釘鈔撮者可比嘉靖庚寅延平黃  
焯刻於永州首載楊士奇序知二人皆明初人士奇序謂二  
人皆私淑朱震亨今觀其書信然又謂北方張元素再傳李  
果三傳王好古南方朱震亨得私淑焉則於宗派源流殊為  
舛迕張李王之學皆以理脾為宗朱氏之學則以補陰為主  
去河間一派稍近而去潔古東垣海藏一派稍遠遺書具存

可以覆案王禕青巖叢錄曰李氏弟子多在中州獨劉氏傳  
之荆山浮圖師師至江南傳之宋中人羅知悌南方之醫皆  
宗之云其宗派授受亦極明白士奇合而一之誤之甚矣

醫經小學

明志六卷

存

自序曰醫意也臨病立意以施治也其書內經載運氣病源  
靡不悉備候天地之變究疾病之機盡調治之理此神聖愛  
人之仁拯羸救在濟物之至道也醫道斯立秦越人演其  
精義述難經漢張仲景論傷寒用藥定方晉王叔和集次及



撰脈經以示後學亦至哉經去聖遠遺文錯簡後學專方而  
惑意幸唐太僕令王冰重整其義啓大法之幽玄釋神運之  
奧妙析理於至真之中俾學者遇證審脈用藥去病根本無  
貶損醫之道明矣而其爲法制勝伐其勢資化助其生扶危  
定亂之功本諸經論知氣識病治理得焉嗟乎學必本於經  
病必明於論治必究於方而能變通而無滯斯能盡夫立醫  
之意矣昔丹溪朱先生以醫鳴江東家君親從之游領其心  
授純生晚學陋承親之訓有年矣其於經論習而玩之頗嘗  
得其指歸不自揆度竊以先生之旨輯其醫之可法本諸經  
論之精微節目更爲定次歌語引例具圖以便記習至於脈

訣之未備者亦爲增正名曰醫經小學蓋欲初學者得以因  
流尋源而不蹈夫他岐之惑有志於古神聖愛人濟物之道  
者其無誚愚以管窺而蠡測或有未至矜其志而加正焉則  
不惟醫道之幸亦斯民之幸也洪武二十一年冬十一月朔  
旦吳陵劉純序

楊士奇序畧曰往年副都御史陳公有戒刻劉純所輯醫家  
玉機微義以爲施治之資矣又欲爲施教之資也并刻純所  
輯醫經小學以傳其書首本草次脈訣次經絡次病機次治  
法次運氣凡六卷一本於素問靈樞難經及張仲景王叔和  
至近代劉守真張潔古李明之朱仲脩諸家之書撮其切要



綴爲韻語類粹以便初學本末條理明切簡備醫學之指南而端本之書也凡善學者皆務本况醫人之司命其可昧本而苟乎哉學醫者誠能熟究是書融會於心將所行皆正途所用皆正法觸類長之於歲論十全何有哉此書非劉氏莫之爲非陳公亦莫之傳學醫之幸生民之幸也純字宗厚吳陵人其父叔淵仲脩之高弟授受有自云

雜病治例

醫藏目錄一卷

存

四庫全書提要曰雜病治例一卷明劉純撰是書成於永樂

戊子未附蘭室誓戒四則叙其父橘泉翁受醫術於朱震亨純承其家學又從其鄉馮庭幹許宗魯邱克容游盡得其法因撮舉綱要著爲一編分七十二證每證各標其攻補之法蓋皆其相傳口訣故略而弗詳初無刊本成化己亥上元縣知縣長安蕭謙觀政戶部時奉命賞軍甘州始從純後人得其本爲鈔版以傳



殿籍考卷五十四

井出宗仙抄寫



